



還言敬神

「阿魁，做毋得，還言敬神！」阿姆大聲咄自家个滿子。阿魁遽遽同伸入餅仔禮盒肚个手爪跑起來，面臭臭仔，嘴項緊唸：「佢肚飢飢，當想食餅仔，逐擺就講還言敬神，還言敬神.....」，阿魁譴著，就春往出，無想聽阿姆嘍嘍嘍个話，乜無想愛看著該想食又食毋著个餅仔！今年六十歲个阿魁，恁起「還言敬神」个頭擺。

五十年前，一般人家普遍就當苦，還做細人仔个阿魁，屋下也共樣恁苦。平常時節，三餐有好食就當好叻，哪有麼个糖仔、零嗒好食！一直愛等到過年過節，轉外家个阿姑、姑丈來，抑係親戚朋友來，正有可能在佢兜準備个等路裡肚，看著餅仔、糖仔禮盒！接著等路，做阿姆个定著會同佢回起來，做細人仔个係講肚飢、嘴飢，就會屋肚間肚、櫃仔拖箱一哪仔去尋、去搵。

阿魁當然知，阿姆毋係私心將餅仔回起來自家食，係屋下苦到無錢好買禮盒！年節，難得有人送來等路，食得个東西就留來敬神，等到神敬好正分屋下人食，恁樣，就省著辦一樣牲儀个錢。阿姆盡知，屋下窮苦就愛認份，除忒煞猛做事，還愛省儉理家，正有法度維持一屋下个生活，將來乜正有法度過緊來緊好个生活。

自阿魁結婚過後，因爭公婆煞猛打拚，日仔過到緊來緊好。細人仔一個一個出世，佢兩公婆毋識為著乳粉錢，在該愁勞博激、春頭磕額，日日分子女過當豐湧个生活。出世在好額家庭个人，係無親身經驗過窮苦个生活，定著無法度感受著生活个艱苦。當然，厥个子女乜毋知五十年前「還言敬神」个頭擺，單淨，共綱人共下打嘴鼓个時節，正會分人恁起、分人講起！

作者：邱一帆

☆詞彙學習☆

【咄】dod`：喝斥。

【等路】den` lu：禮物。

【春往出】zung` gong` cud`：向外跑出去。

【愁勞博激】seu` lo` bog` gid`：既憂愁又激動。

【嘍嘍嘍】nung` nung` nung nung：嘍嘍不停的話。

【春頭磕額】zung` teu` kab ngiag`：形容非常忙碌，到處奔波。

【嘴飢】zoi sai`：嘴饞。

【豐湧】fung` iung`：豐裕、富足。

【搵】bien`：翻找。

【共綱人】kiung gong` ngin`：面對相同環境，有共同生活經驗的一批人。

☆文法學習☆

【係無……定著……】he mo`tin cog`：要是沒有……一定……。「要是沒有」後接某種情況或條件；「定著」後接根據此情況或條件，所得到的結果。

例1：阿魁係無煞猛做頭路，日仔定著無恁好過。（阿魁要是沒有努力工作，日子一定沒那麼好過。）

例2：阿君係無認真上課，定著會分厥姆罵。（阿君要是沒有認真上課，一定會被他媽媽罵。）